



Yesu Aadhimisha Pasaka Yake ya Kwanza

Basi, wazee wake huenda Yerusalemu kila mwaka, wakati wa sikukuu ya Pasaka. Na alipopata umri wake miaka kumi na miwili, walipanda kama ilivyokuwa desturi ya sikukuu.—**Luka 2:41, 42.**

Yusufu na Mariamu walikwea kwenda Yerusalemu kila mwaka kwenye sikukuu ya Pasaka, kulingana na masharti ya sheria ya Kiyahudi. Siku za utoto wa Kristo zilikuwa zimeisha. Alikuwa ameingia katika kipindi cha ujana. Yusufu na Mariamu, kama ilivyokuwa desturi yao, walijiandaa kwa ajili ya kusafiri katika safari ndefu kwenda Yerusalemu. Walisafiri pamoja na Yesu. Walikuwa pamoja na wengine wengi waliokuwa njiani kwenda Yerusalemu kuadhimisha sherehe hii makini.

Haiwezekani kwa akili za kibinadamu kuelewa tafakuri za Mwana wa Mungu alipotazama kwa shauku lile Hekalu kwa mara ya kwanza. Alipokuwa akipita kwenye nyua zake na macho Yake yakitambua kazi ya kuhani aliyehudumu, madhabahu na wahanga wake waliochuruzika damu, uvumba mtakatifu ukipaa kwenda kwa Mungu, na mafumbo ya Patakatifu pa Patakatifu nyuma ya pazia, na kuelewa uhalisia ambao hizo sherehe zilikuwa zikielezea kabla ya kutokea kwake, ni mawazo ya namna gani yaliyoamshwa ndani yake ambayo hata hatuwezi kuyakisia. Kristo Mwenyewe alikuwa ufunguo wa kufungua mafumbo haya matakatiifu ambayo yalieleweka kwa namna isiyo dhahiri kwa Yusufu na Mariamu. Haya yote yaliwekwa ili kumwakilisha Kristo na yalitimizwa katika mauti Yake.

Sherehe hii ya kumbukumbu ya tukio la ajabu la kuondoka kwa Waebrania kule Misri ilipewa jina Pasaka. Usiku walipoondoka Misri, malaika mharibifu aliingia kwenye kila nyumba na kuua wazaliwa wa kwanza tangu yule wa mfalme kitini pake pa enzi hadi yule wa mtumwa wa chini kabisa...

Bwana alitoa maelekezo maalum kwa Waebrania, kwa ajili ya kila familia kumchinja mwana-kondoo na kunyunyiza damu kwenye miimo ya milango yao, na wakati malaika mwenye kuangamiza anapokuwa akipita katika safari yake ya kuangamiza, damu iliyo katika miimo ya mlango ilipaswa kuwa kwao ishara kwamba wale waliokuwa ndani ya nyumba walikuwa waabudu wa kweli wa Mungu. Malaika wa kifo alipita juu ya hizo nyumba zilizoonekana hivyo. Wakati wa usiku huo wenye matukio yasiyo ya kawaida, Waebrania walielekezwa kujiandaa kwa ajili ya safari...

Kulingana na maelekezo waliyopewa na Mungu, wote walijiandaa kwa ajili ya safari yao, wakiwa tayari kwa ajili ya agizo la kutoka Misri...

Wakati desturi ya Pasaka ikielekeza mbele kwenye ukombozi wa kimuujiza wa Waebrania, hapo hapo, ilikuwa ikielekeza mbele, ikionesha kifo cha Mwana wa Mungu kabla hakijatokea. Katika ile Pasaka ya mwisho ambayo Bwana aliadhimisha na wanafunzi Wake, alianzisha Meza ya Bwana mahali pa Pasaka, ili iadhimishwe katika kukumbuka kifoChake. Hawakuhitaji tena Pasaka, kwani Yeye, Mwana- Kondoo mkuu halisi, alikuwa tayari kuwa kafara kwa ajili ya dhambi za ulimwengu. Katika kifo cha Kristo, kielelezo kilikutana na halisi (Youth's Instructor, Mei 1, 1873).